

## Evening Dogri (NSD) Bulletin 05-10-2023

### आकाशवाणी

खास खबरां ..

- 1 प्रधानमंत्री नरेन्द्र मोदी होरें अज्ज राजस्थान दे जोधपुर च 5 ज्हार करोड़ रपे दी केई विकास परियोजनाएं गी शुरू कीता।
- 2 प्रधानमंत्री नरेन्द्र मोदी होरें मध्यप्रदेश दे जबलपुर च बक्ख-बक्ख परियोजनाएं दा नीह पत्थर रखेआ ते उद्घाटन कीता।
- 3 मध्यप्रदेश सरकार नै सरकारी नौकरिएं च महिलाएं आस्तै 35 फीसद आरक्षण दी घोषणा कीती।
- 4 एशियाई खेड़्डें च भारत दा शानदार प्रदर्शन जारी। स्काश दे मिक्सड डबल्स मकाबले ते तीरअंदाजी च महिला टीम नै सुन्ने दे तगमे जित्ते।
- 5 आईसीसी विश्व कप दे अज्ज शुरूआती मकाबले च इंग्लैंड दी टीम नै न्यूजीलैंड आस्तै 283 रंजें दा लक्ष्य रखेआ ऐ।

---

### PM-Rajasthan

प्रधानमंत्री नरेन्द्र मोदी होरें आक्खेआ ऐ जे केन्द्र सरकार राजस्थान च रेल ते शिड़क सरबंधी बुनियादी ढांचे दे विकास लेई कम्म करै करदी ऐ। राजस्थान दे जोधपुर च उनें आक्खेआ जे केन्द्र सरकार हर खेत्तर च तेजी कन्नै विकास बक्खी ध्यान देआ'रदी ऐ। मोदी होरें आक्खेआ जे रेलवे दे विकास लेई राजसीन गी तकरीबन 95 अरब रपे बागुजार कीते गे न। एह पिछली सरकार दे सलाना औसत बजट थमां तकरीबन 14 गुणा मता ऐ। उनें आक्खेआ जे आजादी दे बाद थमां 2014 तगर राजस्थान च तकरीबन 600 किलोमीटर रेल लाइन दा विद्युतिकरण कीता गेआ हा। अमृत भारत स्टेशन योजना दे तैहूत राजस्थान दे 80 थमां मते रेलवे स्टेशनें दा आधुनिकरण कीता जा करदा ऐ। उनें आक्खेआ जे हुन

रेलवे स्टेशनें गी ब्हाई अड्डें आला लेखा विकसित कीता जा करदा ऐ। उनें इब्बी आक्खेआ जे अज्ज शुरू कीती गेदी रेल ते शिड़क परियोजनाएं कन्नै राज्य दे विकास गी बल मिलोग ते कन्नै मकामी अर्थ—बवस्था ते सेलसफा गी बी प्रोत्साहन थ्होग। प्रधानमंत्री होरें अज्ज राजस्थान दे जोधपुर च 50 अरब रुपें दी विकास परियोजनाएं दा नींह पत्थर रक्खेआ ते केई प्रोजेक्टें दा उद्घाटन कीता। इंदे च शिड़क, रेल, शौहरी हवाबाजी, सेहत ते उच्च शिक्षा कन्नै सरबंधत प्रोजेक्ट शामिल न। मोदी होरें जोधपुर दे एम्स च 350 बिस्तरें आला तरुमा सेंटर ते क्रिटिकल केयर ब्लॉक दा नींह पत्थर रक्खेआ। उनें राज्य च आयुष्माण भारत सेहत ते ढांचा मिशन तैहत 7 होरनें क्रिटिकल केयर ब्लॉकें दा बी नींह पत्थर रक्खेआ। प्रधानमंत्री होरें आईआईटी जोधपुर दा भलेयां अज्जै—कल्लै स्थाबै बनाय गेदा परिसर गी राष्ट्र गी समर्पित कीता। एह्दे पर 11 अरब 35 करोड़ रुपें शा मते खर्च कीते गे न। उनें जोधपुर ब्हाई अड्डे च 480 करोड़ रुपें दी लागत दे भलेयां अज्जै—कल्लै दे टर्मिनल भवन दा नींह पत्थर रक्खेआ। श्री मोदी होरें तकरीबन 14 अरब 75 करोड़ रुपें दी लागत दी केई शिड़क विकास परियोजनाएं दा बी नींह पत्थर रक्खेआ।

<><><><><><>

## Amit Shah

केन्द्री गृहमंत्री अमित शाह होरें अज्ज नमीं दिल्ली च आतंक रोधी त्रीए सम्मेलन दा उद्घाटन कीता जेह्दे च खुफिया ते जांच अजेंसिएं आस्सेआ राष्ट्री सुरक्षा गी मजूदा ते नमीं—नमीं पैदा होआ'रदी चुनौतिएं कन्नै निबड़ने उप्पर चर्चा कीती जाग। इनें चुनौतिएं च विदेशी धरतै थमां करवाइयां करा'रदे खालिस्तानी समर्थकें दियां हिंसक गतिविधियां बी शामिल न जिनें गी लेइयै बी बचार—बमर्श होग। अमित शाह होरें आक्खेआ जे नरेन्द्र मोदी सरकार देशा थमां आतंकवाद गी जड़ै थमां खत्म करने लेई पूरी चाल्ली प्रतिबद्ध ऐ। उनें अगें आक्खेआ जे एह्दे पिच्छै मोदी हुंदी आतंकवाद गी बिंदक बी बरदाश्त नेई करने दी सोच कम्म करा'रदी ऐ।

<><><><><><>

## Add Amit Shah

केन्द्री गृहमंत्री अमित शाह होरें आक्खेआ जे छड़े आतंकवाद गी नेई सगुआं एहदे पूरे पराते ढांचे ते तंत्र गी खत्म करने दी लोड़ ऐ ते इस आस्तै सरकारी तंत्र ते टीम इंडिया दी भावना कन्नै कम्म करना जरूरी ऐ। सम्मेलन च बोलदे होई उनें अगें आक्खेआ जे आतंकवाद दे खलाफ कम्म करने आली सब्बनें अजेंसिएं गी इस सोच कन्नै कम्म करने दी लोड़ ऐ जे होर नमें आतंकी संगठन पैदा नेई होई सकन। उनें आक्खेआ जे आतंकवाद दे खलाफ लड़ाई आस्तै देशा दे अंदर बक्ख—बक्ख राज्यें दे इलावा अंतर्राष्ट्री स्तर उप्पर बी सारें गी आपूं चें तालमेल बनाइयै कम्म करना चाहिदा। इस दो रोजा आतंकवाद रोधी सम्मेलन 2023 दा आयोजन नमीं दिल्ली च राष्ट्री जांच अजेंसी आस्सेआ कीता गेदा ऐ। इस मौके एनआईए दे अधिकारिएं गी बेहतर प्रदर्शन आस्तै तगमे बी दित्ते गे।

<><><><><><>

## Skill-JK

जम्मू कश्मीर दे दफा 370 हटने ते इसी केन्द्र शासत प्रदेश दा दर्जा थोने दे बाद इत्थें तरक्की बाढ़े दे कम्म जित्थें बड़ी तेजिया कन्नै तोड़ चाढ़े जा करदे न, उत्थें गै इत्थूं दे नोजवानें लेई कम्म—रोजगार दे मते मौके पैदा करने लेई, स्वरोजगार, हुनर विकास ते स्टार्ट—अप्स गी बी बढ़ावा दित्ता जा करदा ऐ। इनें जतनें दे गै इक हिस्से दे तौरा पर जम्मू कश्मीर दे, हुनर विकास मैहकमे दे कमीशनर सैक्रटरी सौरभ भगत होरें सिविल सचिवालय श्रीनगर च 85 ज्हार नोजवानें गी दित्ती जा'रदी सिखलाई दा जायजा लैता। इनें नोजवानें दी शनाख्त ते ताल जम्मू कश्मीर प्रशासन आस्सेआ शुरू कीते गेदे बैक टू विपेज ते माई टाउन माई प्राइड अभियानें दरान कीती गई ही। कमीशनर सैक्रटरी होरें बक्ख—बक्ख सतहें पर इनें नोजवानें गी बक्ख—बक्ख शोबें च दित्ती जा'रदी

सिखलाई दी प्रगति, रफ्तार उपलब्धिं दा जायजा लैने दे कन्नो कन्नी जम्मू कश्मीर हुनर विकास मिशन गी दरपेश चुनौतिं दे बारे च बी पूरी जानकारी हासल कीती। मीटिंग च जम्मू कश्मीर दे नोजवानें गी हुनरमंद बनाने ते उंदी समर्थ मूजब कम्म रोजगार दे मौके उपलब्ध कराने दे बारे च बी सोच बचार कीता गेआ। उनें सरबंधत अफसरें गी निर्देश दित्ता जे ओ होरने मैहकमें ते निजी कारोबारिं कन्नै बी तालमेल रखन तां जे समर्थ मूजब नोजवानें गी कम्म थोने च सखाल होई सकै।

<><><><><><>

## PM-MP

प्रधानमंत्री नरेन्द्र मोदी होरें अज्ज मध्यप्रदेश दे जबलपुर च 12 ज्हार 600 करोड़ रुपें शा मते मुलल दी विकास परियोजनाएं दे नीह पत्थर रखे ते केई परियोजनाएं दा उद्घाटन कीता। उनें विरांगना रानी दुर्गावती स्मारक दा भूमि पूजन कीता ते उंदी सम्हालै च इक डाक टिकट जारी कीता। इस मौके पर प्रधानमंत्री होरें आखेआ जे पिछली सरकारै देशै दे महान विभूतिं ते जनजातीय समुदायें गी सम्मान नेई दित्ता। उनें आखेआ जे सबका प्रधानमंत्री अटल बिहारी वाजपेयी होरें सब्बनें शा पैहले जनजातीय मंत्रालय बनाया ते जनजातीय समुदायें गी सम्मान दित्ता। श्री मोदी होरें आखेआ जे उंदी सरकारै सरकारी सूचि थमां 11 करोड़ फर्जी नाएं गी हटाया जेह्दे खजाने गी नुक्सान पुजा करदे हे। उनें आखेआ जे उंदी सरकारै जनधन, आधार ते मोबइल दे राएं 2 लख 50 जहर करोड़ रुपे शा मते दी चोरी गी बचाया ऐ। उनें आखेआ जे मध्यप्रदेश अज्ज ऐसी थाहरै पर खेड़ोते दा ऐ जे जेकर विकास दी रफ्तार रूकी गई तां इसी बड़ा भारी नुक्सान होई सकदा ऐ। उनें आखेआ अगले 25 बरें बड़े महत्वपूर्ण न ते विकसित मध्यप्रदेश गै विकसित भारत दी अगुवाई करी सकदा ऐ। री मोदी होरें आखेआ जे एह् समें सख्त मेहनत करने ते सहेई फैसले लैने दा समें ऐ।

<><><><><><>

## Jatinder Singh

केन्द्री विज्ञान ते टैक्नालोजी मंत्री डॉ. जितेन्द्र सिंह होरें आक्खेआ ऐ जे उद्योग जगत थमां एह मेद कीती जाग जे ओह भविक्ख दे सब्बनें स्टार्ट—अप उपक्रमें ते होरने नमें तकनीकी जतनें च संसाधन उपलब्ध करोआने च मुख्ख मददगार बनगंन। उनें आक्खेआ जे शुरूआत थमां गै सब्बने सरबंघत धड़ें च बरोबरी दी लोड़ होग ते एहदे लेई उद्योग जगत गी हर चीजै लेई सरकार पर निर्भर रौहने दी अपनी परानी सोच गी बदलना होग। डॉ. सिंह होरें एह गल्ल नमीं दिलली च एसेचैम पास्सेआ अयोजित त्रीये भारत क्वांटम टैक्नालोजी सम्मेलन च मुख्ख भाषण दे दरान आक्खी। उनें आक्खेआ जे सरकार, शिक्षा खेत्तर ते उद्योग जगत बश्कसा बरोबर रिश्ता होना लोड़चदा ऐ की जे देश उभरदी क्वांटम टैक्नालोजी सनें शोध ते विकास दे खेत्तर च नमीं उंचाइयां छूआ करदा ऐ। उनें आक्खेआ जे आलमी सतह दिएं चुनौतिएं कन्नै निबड़ने लेई आलमी सतह दिएं नीतिएं ते मानकें दी लोड़ ऐ। उनें आक्खेआ जे उद्योग जगत गी जोखिम प्रबंधन लेई अगगे औना होग। डॉ. सिंह होरें आक्खेआ जे परानी बेकार नीतिएं दे मकाबले च मोदी सरकारै साफ नीतिएं आली योजना बनाई। एहदे च डिजीटल इंडिया ते मेक इन इंडिया दे मंतर कन्नै देशै च गै निर्माण दे महौल पर बल दित्ता गेआ। उनें आक्खेआ जे क्वांटम टैक्नालोजी अपनाने आला भारत 7मां मुख्य ऐ। उनें इब्बी आक्खेआ जे भारत अज्ज विकसित देशें दे बरोबर खडोने दा ऐ ते अगगे बी बधै करदा ऐ।

<><><><><><>

## Puri Capacity Develoment

घरें—मकानें ते शैहरी कार्य मंत्री हरदीप सिंह पुरी होरें आक्खेआ ऐ जे सरकारै समर्थ निर्माण पर चेचा जोर दित्ता ऐ की जे एह कार्यबल लेई बड़ा महत्वपूर्ण ऐ। अज्ज नमीं दिल्ली च शैहरी मकामी निकाएं दे समर्थ निर्माण बारे लोआई गेदी राश्ट्री कार्यशाला गी संबोधत करदे होई उनें आक्खेआ जे पैहले समथ्र निर्माण

पर ध्यान केन्द्रित नेई कीता जंदा हा पर हुन मुख्यै च समर्थ निर्माण आयोग ऐ। श्री पुरी होरें आक्खेआ जे 2004 थमां 2014 तगर शैहरी खेत्तर दिएं सब्बने योजनाएं पर खर्च 1 लक्ख 78 ज्हार करोड़ रुपें शा मता हा पर पिछले 9वें ब'रें च एह रकम बधियै 18 लक्ख करोड़ रुपे शा मती होई गई ऐ। पुरी होरें आक्खेआ जे स्वच्छ भारत मिशन करी बड्डा बदलाव आया ऐ। प्रधानमंत्री हुंदे सलाहकार तरुण कपूर होरें इस मौके पर आक्खेआ जे शैहरी मकामी निकाएं दा समर्थ निर्माण बड़ा महत्वपूर्ण ऐ। उनें आक्खेआ जे समर्थ निर्माण शैहरी मकामी निकायें च बड्डा बदलाव आहनी सकदा ऐ। घरें—मकानें ते शैहरी कार्य मंत्रालय दे सचिव मनोज जोशी ते समर्थ निर्माण आयोग दे प्रधान आदिल जैनुलभाई होरें बी कार्यशाला गी संबोधत कीता।

<><><><><><>

## Jammu Railway Station

रेल मंत्रालय द भारतीय रेलवे बोर्ड दे मिंबर डॉ. संजय बंसल होरें जम्मू रेलवे स्टेशन दा औपचारिक निरीक्षण कीता। इस मौके उंदे कन्नै मीडिया कर्मी ते जम्मू दे केई प्रमुख शैहरदार बी गेदे हे। निरीक्षण दरान जम्मू रेलवे स्टेशन दा पूरा प्रशासन बी उत्थें मजूद रेहा, जिन्नै उनेंगी जम्मू तवि रेलवे स्टेशन दे प्रबंधन ते बवस्थाएं बारे जानकारी दित्ती। निरीक्षण दरान स्टेशन च दाखल होने दे रस्ते पर नाका, गड्डियां खडेरने लेई पार्किंग, रेल पटरिं गी नियमित तौर पर साफ करने, पीने आले पानी गी क्लोरीन कन्नै साफ रखने, प्लैटफार्में पर यात्रिं दे बौहने दी बवस्था, शौचालयें दी साफ—सफाई, रेल गड्डिं च चोरी दे मामलें पर रोक लाने लेई प्रबंध, एस्कलेटरें दे रख—रखाव, नमें प्लैटफार्म तौले चालू करने ते इस चाल्ली दे होर केई विषयें पर जानकारी हासल कीती गई। इंदे बारे चर्चा दरान केई नमें सुझाएं पर बी सोच बचार कीता गेआ। डॉ. बंसल होरें दस्सेआ जे अज्ज होई दी इंसपेक्शन दी रिपोर्ट रेल मंत्रालय गी भेजी जाग तां जे जम्मू तवि रेलवे स्टेशन दी बेहतरी ते विकास दे कम्में गी रफतार थहोई सकै।

<><><><><><>

## MP-Women

मध्यप्रदेश दी सरकारै जंगलात मैहकमे गी छोड़ियै होरनें सब्बनें भर्थिएं च महिलाएं लेई 35 फीसद आरक्षण उपलब्ध करोआने दी अधिसूचना जारी करी दित्ती ऐ। राज्य च महिलाएं गी 35 फीसद आरक्षण देने लेई मध्यप्रदेश लोक सेवाएं (महिलाएं दी नियुक्ति लेई विशेष प्रावधान) नियमावली 1997 च संशोधन कीता गेआ ऐ। अधिसूचना मूजब सिद्धी भर्थी दी स्थिति च जंगलात मैहकमे गी छोड़ियै महिलाएं गी राज्य दिएं सब्बनें असामिएं च 35 फीसद आरक्षण मिला करोग। मुख्यमंत्री शिवराज सिंह चौहान होरें हाल च गै पुलस ते होरनें सरकारी नौकरिएंच 35 फीसद असामिएं लेई महिलाएं गी भर्थी करने दा ऐलान कीता हा। पंचैतें ते शैहरी निकायें दे चुनाएं च महिलाएं गी 50 फीसद आरक्षण देने आला मध्यप्रदेश पैहला राज्य हा। राज्य च पुलस च महिलाएं दी भर्थी लेई 30 फीसद आरक्षण हां महिलाएं दे नां संपत्ति दे पंजीकरण पर बी छूट दित्ती जंदी ऐ। राज्य च कुल 5 करोड़ 60 लख मतदाता न जिंदे चा 2 करोड़ 72 लख महिलां न।

<><><><><><>

## Jammu Airforce

भारतीय ब्हाई फौज नै कुसै बी करोपी दी सूरतै च हैलाकाप्टर दी मदद कन्नै राहत ते बचाव कारवाई सरबंधी अभियान चलाया। एह अभियान जम्मू एयर फोर्स स्टेशन च भारतीय ब्हाई फौज दी हैलाकाप्टर युनिट आस्सेआ चलाया गेआ। इस चाल्ली दी कारवाई सिक्कम च बद्दल फटने ते हाड़ औने पर कीती जा'रदी ऐ ते पिच्छे जनेई हिमाचल प्रदेश च बी हाड़ औने पर हैलीकाप्टरे राएं जिस चाल्ली राहत ते बचाव कम्म तोड़ चाढे गे,ठीक उस्सै चाल्ली दी कारवाई दा भ्यास जम्मू च बी कीता गेआ। विंग कमांडर इरफान जैराल जेहड़े जे जम्मू च हैलीकाप्टर युनिट दे कमांडिंग अफसर न, होरें इस मौके दस्सेआ जे एह युनिट कुसै बी

चाल्ली दी चुनौती दा मकाबला करने लेई पूरी चाल्ली तैआर ऐ। उनें आक्खेआ जे कुसै बी आपदा दरान प्रभावितें गी बचाने लेई बक्ख-बक्ख चाल्ली दे उपकरणें दा बी इस्तेमाल कीता जंदा ऐ।

<><><><><><>

## Asian Games

चीन दे हांगझोऊ च जारी एशियाई खेड्डें दे 12में दिन भारत नै हुनै तगर सुन्ने दे 3, चांदी दा इक ते कैह् दा बी इक तगमा जित्ती लैता ऐ। तीरंदाजी दे कमपाउंड मर्दे दे टीम मकाबले च भारत गी सुन्ने दा तगमा हासल होआ। फाइनल च ओजम देवतले, अभिषेक वर्मा ते जावकर प्रथमेश दी टीम नै दक्खनी कोरिया गी 230 दे मकाबले 235 अंक कन्नै हराया। भारत दा अज्ज एह् सुन्ने दा त्रीया तगमा ऐ। तोआई मदे कम्पाउंड मकाबले च ज्योति सुरेखा, परतीत ते ददिति दी तिकड़ी नै चीनी ताइपे गह हराइयै सुन्ने दा तगमा जित्तेआ। सकवाश मिक्स्ट उबल्स फाइनल च दीपिका पल्लीकल ते हरिंदर पाल संधू दी जोड़ी नै मोहम्मद दी जोड़ी गी हराइयै भारत गी सुन्ने दा तगमा दोआया। मर्दे दे सिंगल्स मकाबले च भारत दे सौरव घोषाल गी चांदी दा तगमा मिलेआ ऐ। फाइनल च सौख गी मलेशिया दे इन याव एनजी गी मलेशिया दे ईन याव एनजी थमां 1–3 कन्नै हार दा सामना करना पेआ। कुश्ती च अंतिम पंछाल नै कैह् दा तगमा जित्तेआ ऐ। भारत हुन कैह् दे तगमे लेई मकाबला करोग। भारत इनें खेड्डं च सुन्ने दे 33 तगमें सनें कुल 86 तगमें जित्तिyै चौथी थाहरै पर ऐ।

<><><><><><>

## Cricket

मर्दे दे इक ध्याडे आले क्रिकेट मैचें इदी आईसीसी विश्व कप 2023 प्रतियोगिता दे अज्ज अहमदाबाद च खड्डें जा करदे पैहले मैच च पिछली बारी दी विजेता इंग्लैंड दी टीम नै न्यूजीलैंड दी जित्त लेई 283 रंजें दा लक्ष्य दित्ता ऐ।

न्यूजीलैंड नै टॉस जित्तिरै इंग्लैंड गी बल्लेबाजी दा साद्धा दित्ता। इंग्लैंड दी टीमै तैह 50एं ओवरें च 9 विकेटां मुआइयै 282 रंज बनाए। इंग्लैंड दी तरफा जे रूट नै सब्बने शा मते 77 रंज बनाए जदके ओहदे कप्तान जोस बटलर नै 43 रंजें दा योगदान दित्ता। न्यूजीलैंड दी तरफा मैट हैनरी नै 3 विकेटां लैतियां जिसलै के मिशेल सेंअनर ते ग्लेन फिलिप्स नै 2-2 विकेटां अपने नां कीती। इनें दौनें टीमें पिछली बारी दे विश्व कप दा फाइनल मकाबला खेड्डेआ हा जेहदे च इंग्लैंड नै बाजी मारी लैती ही।

<><><><><><>